

ALL NATIONS GOSPEL PUBLISHERS



www.angp-hb.co.za



info@angp.co.za

मिनख रौ हियौ

आतमा रै हियै री आरसी
(दस चितरामां में रूपक तरां बयान)

आ पोथी पैलीदाण 1732 रै सड़कै फ्रान्स में छपी . फेरुं 1929 रा सईका में अफरीकी मिसन सारू रेव्हं जे आरं स्वेन्ड (Rev. J.R. Gschwend) इण पोथी नै अेकर भली मांडी . इणरा उल्था दुनियां री न्यारी न्यारी अढ़ाई सौ भासावां में 'ऑल नेसन्स गॉसपॅल पब्लिसर' छाप्या जका अबार 127 देसां में बांटीजै. न्यारी न्यारी भासावां बोलणिया, अमीर-गरीब, न्यारा न्यारा धरम पालणिया मिनखा नै आ पोथी अध्यात्म री सांचाई जोवण रौ मारग बतावै . मिनखा सांरू परमातमा रौ सनेसौ इजरायल देस में ईसू मसीह सूं 586 बरसां पैला मातमा यहजेकेल फैला दीनो 'क "म्है थांने नुवो हियो अर नुवो मगज बगसूंला... पछै थे म्हारा लोग अर म्है थांरौ परमेसर होंऊला"' (यहे० 36:26-28).

COPYRIGHT
ISBN 0-947052-19-4

ALL NATIONS GOSPEL PUBLISHERS
P.O. Box 2191, PRETORIA, 0001, R.S.A.
(A Gospel Literature Mission financed by donations)
(Reg. No. 1961/001798/08)

मिनख रौ हियौ

परमेसर रौ देवरौ कन सैतान रौ कारखानों

(1 यूहन्ना 3:4-10)

आप ज्यू ज्यू आ पोथी बांचौ दिमाग में इण वात नें खरी जाणजौ के आ पोथी अेक काच या आरसी जैड़ी है जिण में आप खुद री छिब परतख देखौला. जे आप ईसाई व्हो कै दूजो धरम पाळणिया, खुद नै इस्यो देखौला जियां परमेसर आपनै देखै . “मिनख फकत बारली कानी देखै पण म्है हिवड़ा में झांखू” (1 शमु० 16:7). परमेसर आपनै आपणे असल रूप में देखै .

सैतान सारा झूठ रौ बाप है . वो अन्धारे रौ मालक अर इण दुनियां रो भगवान व्हे . वो भेख बदळ परमेसर रौ सांग करै . मिनखां ने खोटै मारग ले जावै . पैला ज्यू अजै भी केई दाण केई जणा खुदनै झूठ-मूठ ईसू रा नुमाइन्दा वतावै. अठाताईं क सैतान भी देवदूत रो भेख धारनै आवै (2 कुरि० 11:13,14) . सैतान जकौ इण दुनियां रौ भगवान बणै, लोगां नै अन्धारा मांय राखै ताकि वे जाण नी सकै ‘क परमेसर वांसु हेत करे या ईसू वानै बचावण खातर खुदरा प्राण तकात दे दीना (2 कुरि० 4:4) . अभरोसो राखण्या सगळा पापी परमेसर सांरू कै तो मुड़दा है कै आंधा . वां माथै सैतान रौ राज चालै (इफि० 2:1-2) . जद तांई वारी आख्यां चानणो नी व्हे कै वे रूळियोड़ा है, वे सत्यानास रौ मारग पकड़ मेल्यो है . “मै कदाई पाप नीं करचो” केवण्यो खुदोखुद नें धोखे में पाळै. इणी खातर परमेसर रौ सपूत जलम लीनो ताकि सैतान रा निखेद करमा रौ नास व्हे सकै (1 यूहन्ना 3:8) . “परमेसर रै सरणे जावौ, सैतान नें धोपड़ौ-वो खुद न्हाट जासी . परमेसर रै नैड़ा आवौ, वो खुद थारे कत्रै आय जासी”

(याकूच 4:7-8) . आ पोथी भणतां नै इणरा चितराम निरखतां थानै खुद रौ हीयौ दीखण लागैला. परमेसर री जबरजोत रै चानणै में खुद रो हीयौ निरखौ. खुद रा पाप कब्रलौ, पापां सू नट्टो मती . परमेसर केवै “जे आपां कैवा ‘क आपां कोई पाप नीं करां तो फकत खुद नें धोखौ देवां, आपां में सांच रौ अंस

नीं व्है” . जे खुदरा पाप परमेसर सामी कबूला तो वो आपरै कवल मुजब भली करैला . “परमेसर रै सपूत ईसू रो रगत आपणा सगळा पाप धोवै” (1 यूहन्ना 1:1-10). थां माथै कै तो सैतान रौ राज चालै कै परमेसर रौ . या तो थे पाप रा पूतळा हौ कै परमेसर रा टाबर . जे थां माथै पाप है तो ढको मती, उणनें कबूलियां केडै परमेसर नें हेलौ मारौ . वो प्रभु ईसू रै जरिये थाने मुगत करैला जको पापियां नें तारण खातर जळम लीनो है . वो आपण माथै सैतान री सगती तोड़ण अर पाप मिटावण सांरू अवतार लीनौ . वो सगळां नै बचावण वाळौ है . थां सांमी परमेसर है जको थांरा झीणा भेद, मन रा बिचार नै करमां सूं वाकफ है . खुद अर करमां नें परमेसर सूं कत्तई छाना नीं राखीजै . “वो जकौ अपाणा कान वणाया, खुद बाळौ नीं है . जको अपाणी आंख्या वणाई - वो खुद देख नीं सकै कांई ?” (भजन० 94:9) .

“परमेसर सगळी दुनियां नें बारीकी सूं निरखै अर वां नै सगती बगसै जका मन सूं उणरा सांचा भगत है” (2 इतिहास 16:9) .

“मिनख रै हरेक पांवडै री वो खबर राखै . अन्धारै में वा काळस नीं जकी किणी पापी नै परमेसर री निजर सूं लुकाय सकै” (अय्यू 34:21,22) .

“ईसू खुद नै वारै भरोसै नी छोड़चौ, वो सगळां नै जाणै” (यूहन्ना 2:24) .

सो “वो सोरौ है जिणनै पाप सांरू माफी री बगसीस मिळगी या जिणनै कुकरमां री सांरू खिमिया मिळगी . धत्र है बे मिनख ज्यारै अधरम रौ लेखौ परमेसर नीं लेवै, जिणरी आतमा कपटी नीं व्है” (भजन० 32:1-2) .

चितरामा रौ खुलासौ

पैलडो चितराम

औ चितराम बाईबल में मंडिये थकै पापी मरद के लुगाई रै हीयै रो है या उणरो जकौ दुनियांदारी रा गोरखधन्धा में पजियोडौ है - जिणमें मिनख सुभाव रा लोभ-लालच भरिया पड़िया है . परमेसर री दीठ में मिनख रै हियै रौ औ खरौ चितराम है . मदछकिया राता नैणा री विगत नीतिवचन 23:29-33 में


दीयोड़ी है - “म्हनेँ वो मिनख बतावौ जकौ दारू पीवण में आत करे-जकौ नित नुवा दारू चाखणी चावै .म्है थाने उण मिनख सू मिळावूँला जको खुद रा करमां सूँ घणौ दुखी है नै कळपतो रेवै-जकौ दूजां सांरू अबखायां मांडै अर औळमा देवै. उण रा नैण खीरां दाई राता है अर खुदरा करमां सूँ मांडचोड़ा झरूटिया उण माथै सुभट दीसै . दारू कानी मत डिगौ भलाई वो रातौ चिट व्है- पैला में चिलकै अर मजा सूँ गळै उतरै . आगलै दिन थाने लखावैला जाणै करैत सरप डसियोड़ी है - थाने भांत भांत री चीजां दीसैला अर थे सीधा-ऊंधा बकौला”. इण में मिनख रै माथै रै हेटै हियै रौ चितराम है जिण में भांत भांत रा जिनावर परा मंडियोड़ा है . अँ जिनावर पाप रा पूतळां रै उनमान देखाया है जका हियै में वास करै . मिनख रै हियै सूँ ही ज सगळा पाप निपजै . नबी यरमियाह रै मारफत परमेसर केवै “मिनख रै मन रौ किणी नें बेरौ नी व्है. सै सूँ वत्ती धोखे री चीज है मन - जिणरी मांदगी लाईलाज है” (यिर्म० 17:9).

ईसू खुदोखुद पक्कायत केयौ “मिनख रै हिंवडै सूँ खोटा विचार उपजै जका उणसूँ खोटा करम करावै . धाड़ौ,हित्या,व्याभिचार, लोभ, दुस्टपणौ, छळ, लुच्चाई, खोटी निज़र, निन्दा, घमंड अर मूरखपणौ सगळी बातां मिनख रै हियै उपजै अर उणनै पाप रो भागी वणावै”(मरकुस 7:21-23).

1. **मोरियौ** : इणरौ फूटरापो तो सगळां नै व्हालौ लागै पण अेठे मिनख रै हियै मांय सूँ घमण्ड रूपी पाप सुभट दीसै . लुसीफर अेक बगत परमेसर रो खास अर चानणो करतौ देवदूत हो, पण वो घमण्ड लारै खुदरी ठौड़ गमाई - उण केडै परमेसर रौ वैरी अर सैतान व्हेग्यौ (यशा० 14:9-17, यहे० 28:12-17).

घमण्ड नरक री खोह सूँ आवै अर खुदनै भांत भांत रा तरीकां सूँ परगत करै. अलेखूं मिनखां नै खुदरा धन-सम्पत रौ गुमान व्है तो केयां नै घणी भणाई लिखाई रौ . केई जणा अधनागा फैसनवाळा बेसरम कपड़ा पैरचां पोमीजै . रूणझुण करता गैहणा, चूड़िया, बींटी जिसी चीजां रौ गुमेज पाळै. आ बात यशायाह 3:16-24 में खुलासै कीयोड़ी है .किणी नें आपरा वडेरौ रौ गुमान है तो कोई खुदरै देस, भासा, संस्कृति, खेलकूद सूँ फूलीजै : पण आ बात भूल जावै ‘क

परमेसर घमंडियां ने आगै नी बधण दै पर नरमाईवाळां माथै पूरमपूर मया करै (1 पतरस 5:5) . खुद री बढ़ायां करणवाळै घमंडी सूं परमेसर छेटी राखै (नीतिवचन 8:13) . “सत्यानास सूं पैला गरब अर ठोकर खायां पैला घमंड व्हे” (नीतिवचन 16:18) .



चितराम पेलौ : पापी मिनख रौ हियौ

2. **बकरौ** : सरीर री कामना, निखेदपणा अर लम्पटपणा रौ पूतळ्यौ व्है बकरौ. इण जुग रा छेहला दिनां में अै पाप इतरा वधग्या है 'क आज सगळ्यां नै दो हजार बरसां पैला कैयोड़ी प्रभु ईसू री बात सांची लागैला . वे केयौ' क संसार रो छेहलौ बगत सदोम अर गमोराह रा दिनां ज्यू व्हैला. पाप भरियै जीवन रौ तरीकौ फकत मरद अर लुगायां नै पकड़ मेल्या व्है, आ वात नीं है . औ तरीकौ धरमी लोगां रै घरां में, धरम सभावां, इस्कूलां, कॉलेजां और हॉस्टल तकात में जाय पूगौ है. बेसरम दुस्तीपणौ आपरो झीणौ रूप धार नै सिनीमा, थियेटर, सगली पौथ्यां अर केई दूजा तरीकां सूं मिनखां रै हीयां ताई परौ पूग्यौ है . जकै ने परमेसर पाप मानै वो नुवा विचार में पुत्र गिणीजै . करोडूं मोटचार जीवन रा अरथ सिनिमा कै उपन्यासां में खोजै . पण लाधै फकत पीड़, सरम अर पिछतावौ . सिनिमा रा अै रूळेट अैक्टर अैक्टरणीया नुंवी पीड़ी सांरू असल जीवन रा हीरो गिणीजै; रूळियारपणौ नाचघरां सूं भी उपजै . परमेसर रा घडियोड़ा पवीत मिनख युसफ (उत्पत्ति 39) जिसा री अबै मिसाल नीं दिरीजै. अणभणिया अफरीकी जूना जूलू जका लम्पटीया अर कुकरमियां नें मार न्हाकता वे अबै नुवै जमाने री सभ्य बाजणवाळी पीढ़ी नें सीख देय सकै . न्याव रै दिन वे आंपणै सामी परा मंडनै आंपानै दोखी करार देय सकै . परमेसर केवै 'क कुकरम नें रमत मत बणावौ-उणसूं अळगा न्हाटौ; कुकरम सूं वचौ . "मिनख रा सगळा पाप उणरै डील रै बारै व्है पण कुकरमी खुदरी देह रै खिलाफ़ पाप करै . कांई थें नी जाणौ 'क देह परमेसर री बगस्यौड़ी पवीत आतमा रौ देवरौ 'क मिन्दर है ? थें खुदोखुद रा नीं हौ, थारौ मालक परमेसर है'" (1 कुरिं 6:18-19). "जे कोई परमेसर रा देवरा नै मेटण री चेस्टा करैला, परमेसर उणनै माटी मिळाय दैला क्युं कै परमेसर रो देवरो पवीत है अरं थे खुद उणरा मिन्दर हौ'" (1 कुरिं 3 :17).

3. **सूरडौ** : दारूपीवण अर गोजरगंडापणै रा पाप बतावै . मारग में लाधै जकी हरेक चीज इकारण वाळ्यौ औ जिनावर चोखै-भुंडै री परवा नी करै . इणी तरा पापी हियौ रो मिनख भी हरेक खोटी सीख, इसारा, चितराम, पौथ्यां तकात नै गिटतो जावै . मिनखा सरीर तो परमेसर रौ जीवतो देवल व्है . औ सूगले खाणै,

दारू, खोटी आदतां जियां बीड़ी-तमाकू, अमल, नसे री गोळियां आद सूं परौ विगडै . मिनख पैला कदैई बीड़ी-तमाकू कै अमल रौ इतौ बन्धाणी नीं व्हेतो. सैतान रा गुलाम तमाकू खावण-पीवण्या नें फकत परमेसर री मया बचाय सकै. घणकरा धरमी मिन्दर गिरजाघरां कै दूजी चोखी ठौड़ बीड़ी सिगरेट पीवण सूं परहेज करै . उठै तमाकू पीवण नें परमेसर रौ अपमान मानै . पण दूजी सगळी ठौड़ा वे इण सडियल रोपै (तमाकू) अर बीजा नसा वापरता संको नीं करै . खुद रा सरीर नें जको परमेसर रौ सांचौ मिन्दर है, बरबाद करै . इण करम सूं कदास वांरो मन भी नीं कळपै . “थे पक्कायत जाणौ” सन्त पौलुस केवै “क थे परमेसर रा मिन्दर हौ जिण में परमेसर री आतमा रौ वासौ है . सो जे कोई इण मिन्दर रौ नास करैला, परमेसर उण रौ सत्यानास करसी.” (1 कुरि^० २:1९,17;०:18,19) .

परमेसर री दीठ में लोभी मिनख सांरू घिरणा व्हे या उण मिनख रौ की मोल नीं व्हे . आपां जीवण सांरू जीमां, जीमण सांरू कोयनी जीवां . चोखै भोजन सूं भूख तौ मिट सकै पण लोभ हरमेस चीखतौ रेवै - “भळै दै, भलै दै” .

लोभ नै कदास सन्तोख नीं व्हे, उणरौ पेटौ कदैइ नीं भरीजै . जूनै नेम मुजब खाणखण्डा अर दारूखोरां नै भाटा मार मार नें मौत देणी चाइजै (व्यवस्था वि^० 21:18-21) . दारू खोरा अर खाणखण्डा दोन्यू फकीर व्हे जावै . जे फकत खावौ अर सूवौ तौ जलदी थे चीथरा पैरण दूकौला (नीति व^० 28:7) . मत भूलौ उण अमीर नें जकौ भोग विलास रौ दास हौ, मरियां केडै सीधौ नरक में पूयौ अर अपरम्पार पीड़ा भोगण लागौ . दारू सूं जकी बुरायां जलमे वांने कदास गिणावण री दरकार नीं है . सगळा जाणै ‘क इणनै मामूली बात नीं समझणी. परमेसर साफ केवै ‘क कोई दारूडियो उण रा राज रौ हकदार नीं व्हे सकै . बीयर भोजन कोयनी, आ पीवण री चीज है जकी मगज में असर करै, भरमावै; सो जका पीवै वे काळायां करै . कुकरमी व्हेय अेक दूजा रा जीव तकात ले न्हाकै . प्राण लेवण जिसो अकरम कदास बिना पीयां नीं व्हे . दारू बोबाड़ भी करावै अर गैलायां भी - सो दारू पीवण सूं वधनै दूजी कोई मूरखता नीं व्हे .

तेज दारू काढ़ै नै बेचै वे भी परमेसर रा दोखी व्हे . परमेसर वाने केवै
 “बोतल रा भड़जोधां नै हाय लागै जका दारू पीवण में निसंक बादरी देखावै”
 (यशा० 5:22) . “लानत है जे थे थारा पाड़ोसियां नै इत्तौ दारू पावौ कै व्हे
 नसा में चूर व्हे जा” (हबक्क० 2:15) . “थे चोखी तरा जाणौ ‘क दुस्टां नै
 सुरग रौ राज नी मिळै . खुद नै धोको मत दौ . खोटी नीयत रा, जका मूरतां
 पूजै, लुच्चा, चोर, लोभी या दारूडियां सूं कोई भी परमेसर रा राज में रैवण रा
 हकदार नीं व्हे” (1 कुरि० 6:9,10) . मिनख रा पाप छाना नीं रेवै .
 “लम्पटपणौ, कुकरम, पूतळियां पूजणौ नै भूत-पलीत चेतावणा इस्या पाप
 गिणीजै . मिनख मिनख रौ दुसमी व्हे अर भिड़ै, आपसरी में होड़ाहोड़ करै .
 न्यारी न्यारी टोळियां बणावै - अेक दूजा सूं बळै, दारू पीवै नै मछरां करै . यां
 करमां रा खूटोड़ां नै परमेसर रा राज में ठौड़ कोयनी” (गला० 5:19-21) .
 “दारू रा मतवाळा होयां फकत बरबादी व्हे . आछौ रैसी जे थे पवीत आतमा
 सूं मस्त व्हे” (इफि० 5:18) .

जिणने भी आतमा री तिरस व्हे उणनें प्रभु ईसू न्यूतौ देवै - “जकौ तिरसौ,
 व्हे म्हारै नैड़ो आवै” (यूहन्ना 7:37,38) . “हरेक जिणनै तिरस लागी थकी
 है - आवौ, अठै पाणी है . वे सगळा आवौ जका गरीब है - मक्की मोळावौ नै
 खावौ. आवौ नै खरीदौ आतमा रा दाखरस अर दूध जका फोकट में मिळै”
 (यशा० 55:1) . “जिणनै म्है अेकर पाणी पाऊंला वो पाछै कदैई तिरसो नी
 रेवैला . म्हारै पायोड़ौ पाणी इमरत बणैला अर अणत काळ ताई नी खूटैला”
 (यूहन्ना 4:14) .

4. **काछबौ** : टाळमटोळी, आळस नै झाड़ा मिनतर रौ रूप व्हे . सामै मंडणियाँ
 भूतां दाई ही तो व्हे (1 समु० 15:23) . “जको काम सूं न्हाटै वो आळसी
 खुदोखुद नै मारै . वो कोरा मंसोबा बांधतौ रेवै . (नीति० 21:25,26) . इजराइल
 रा लोगां नै अेकर यहोशू केयौ, “अठै फालतू मत ढबौ, तुरत मांयनै जावौ, वा
 देस नै कबजा लेण में आळस मती करौ” (न्यायि० 18:9) . मिनख इतरौ
 आळसी व्हे ‘क उणनै परमेसर री चीजां सोरी नीं मिळै . ईसू फरमायौ “सांकड़ै

दरूजे में वड़ण री पूरी चेस्टा करौ” (लूका 13:24) . “जोवै सो पावै” (मत्ती 7:8) . “सरग रा राज माथै भारी धाड़ौ पड़ियौ . जकौ सगतीवाळौ हौ उणरै राज हाथै आवै” (मत्ती 11:12) .

जकौ मिनख तारण अर आतमा रै कल्याण री वातां सूं लापरवाह व्हे जावै तो उणरौ जरूर नास व्हे . आळस मिनख नै परमेसर री भगती, ग्यान रा झीणा भेद सोधण सूं, मयावाळा खण लेवण सूं रोके अर भिस्ट मिळण रौ मारग झेलाय दै . जद परमेसर री पवीत आतमा आपनै वतळावौ नै त्यार कीया ‘क आपरौ हियौ उणनै तुरत अरपण करदौ तद सैतान आपमें आळस उपजावौ नै केवौ ‘क औ कारज कालै या भळै किणी दिन करजे . स्यात अेड़ौ मोकौ भळै नीं बावडै, आप ईसू प्रभु अर वैरा तरण री छोळा खायां बिना हीज मर परा जावौला . परमेसर केवै “जे आज थाने उणरी बाणी सुणीजै तो जीव नें काठौ मती करौ जै थारा वडैरा करनै परमेसर सूं वैर करचो” (इब्रा 3:7,8) . घणकरा मिनख यूंरूळगा ‘क वे तरण रै मोके नें छोड़ भळै दूजे मोके नें उड़ीकण लागा जको उणानें कदास नीं लाधौ . भवीस या कालै रौ दिन किणी सांरू तै सुदा नी व्हे .

काछवै री टोपाळी घणकरा जादूगर कै टोटका करण्या वरतै . अै मिनखां सूं जादू-टोटका, भूत-पत्नीता में विसवास वा भविसबखाण रौ पाप करावै अर वारै नै परमेसर रै बिचाळै छेटी करावै . परमेसर सदीव मिनखां री मदद सांरू त्यार व्हे सो इम्तिहान, साज-मांद, सोक-संताप में छुटकारो पावण नें परमेसर री दवायती देणी चाहिजे . फकत चोखै-माडै भाग भरोसे तकलीफ नीं मिटै . परमेसर तौ हरमेस मदद सांरू त्यार व्हे . “पण टोटका करण्या, विभचारी, हित्यारा, पुतली पूजण्या अर जिबान-करणी सूं झूठां मिनख सरग राज में नीं जावैळा” (प्रका 22:15) .

झाड़ा-झपटा या मरचोड़ां री आतमावां सूं वंतळ करण्या री सला मत लेवौ . अैड़ा नै वतळावणौ थारौ हीण करम मानीजैला . परमेसर कैवे- “म्है थारो मालक हूं” (लैव्य 19:31) . “जद कोई केवै ‘क फलाणी बात हरमेस गुणमुणावता नै खुसफुस करता ओझा सूं बूझौ” तद थानै सामौ सवाल पूछणौ

चाहिए, “रया नै खुद परमेसर सूं नी बूझणौं चाहिए ? कांई जीवतां री वातां मुड़दां सूं करां ?” “पाछौं पडूतर दौं ‘क’ थै परमेसर री बाणी सुणौं . बिचौळियां री वातां माथै ध्यान मतना दौं . इणसूं थारौं की भलौं नीं व्हैला” (यूशा० 8:19-20).

थे जद आ पोथी बांचौं, परमेसर थाने वतळावै अर हेलो पाड़ै कै पापाचार सूं थारौं मन फेर, जीवण उणनै निज़र करदौं . पण थारे मन में काछबै री आतमा थाने इणसूं वरजै . हर तरा सूं ड़रावै नै रोके .” जे म्है सांचौं ईसाई अर परमेसर पाछे चालणियाँ बणजाऊ तो म्हारे परवार रा मिनख, भायला नै दूजा लोग कांई कैसी ? कांई होसी जे मैं नाचण-गावण, गोठ-गूगरी या दुनियां रा खेल-तमासा रौ मजौ नी लेय सकूं ? प्रभु ईसू मसीह री भागवानी, उणरी अथाग सांयत, सबदां री लिखावट सूं बारै उणरो मोद, आं सगळी वातां टाळ वे वातां देखण लागौं जकी थाने ईसू सूं छोटी करावै . मिनख नै मिनख या मौत रौ ड़र थानै हरमेस सैतान रै पंजे में राखै . मौत रै ड़र सूं जका जीवण रा गुलाम बणया थका है वांने मुगती रौ गेलौं वतावण सांरू ईसू आयौ है (इब्रा० 2:14,15) . इणसूं टाळमटोल कै संको करण वाळी आतमा आपरै हियै नें काछबा रै करडै खोळ जियां बणाय राखै . सो चेतो नै सावचेच रेवौ .

5. **चीतौ** :- अेक क्रूर अर दुस्त जिनावर है . नफ़रत, रीस अर तुनकमिजाज़ी अकसर मिनखां रै हीयै राज करै . केई वळा वांनै हित्यारा तकात बणाय देवै . इण अबखै सुभाव नें आप घणी कोसीस कीयां भी ढ़ाब नी सकौ . वो तो ढ़बै आपोआप अचाणचक फूटचां . ठीक औ व्है कै पैला आपणी रीस नै कबूलां पाछै प्रभु ईसू सूं छुटकारै सांरू अरदास करां . “रीस कीयां अबखायां वधै” (भजन० 37:8) . “रीस मारै अर नास करै . घिमण्ड ‘क रीस मूरख हियै बसे जिणसूं दूरा रचौ” (नीति० 27:4, सभो० 7:9; कुलु० 3:8) .

अलेखूं मिनख डरपोकपणा में दारू पीवै या बदळै जैड़ा करम करै . वां सारू दारू काळिन्दर रा विस रौ काम करै (व्य०वि० 32:33) . पापियां रै हियै नै बदळौं लेणौं चोखौं लागै पण परमेसर वांसू भी बदळौं लेवै . ईसू केवै-“जूं

खुद रौ जीव व्हालौ लागै उणी तरा पाड़ोसियां सूं भी हेत करौ” (मत्ती 12:31), अठै ताई “थांरा दोखियां सूं भी हेत करौ” (मत्ती 5:44) . आपां जे दोखियां नै माफी बगसदां तो परमेसर आपणां खोटा करम माफ़ करण रा वाचा देवै (मत्ती 6:12) . कुढ़ती अर खीजती आतमावां सूं परमेसर घिरणा करै. जुद्ध री हूस अर लोही बैवावण री कुबाण मिनख रा हिया में उपजै . जे मिनख जात नै घणै बगत धरती माथै रेणौ व्हे तो सांची सांयत वारै हियै बैठणी जरूरी है .

6. **सांप** :- सैतान रौ भेख धार अदन रा बागां में हव्वा नै ठगी . आदम-हव्वा रौ परमेसर सूं सम्प बिगड़ग्यौ . असल में सैतान आदम-हव्वा सूं बळतौ . सैतान वां दोन्यां नै आपसरी रा हेत अर परमेसर सूं वारै सम्प रै पाण दुनियां माथै राज करता देख्या जकी उणनै नी भाई . बळत रै कारणै वो आदम-हव्वा रौ नास तेवड़ियौ . वो वांरी सांयत जिन्दगी मै विस घोळ दीयौ . घणकरा मिनख बळै नै दूजां नै राजीखुसी देख दोरा व्हे . पाछै वे दूजां री सांयत रौ नास करण दूकै . ईसका सूं मन में खोटा विचार उपजै जका हित्या तकात कराय देवै . आ बळत परण्योड़ा में अणूती व्हे “ धणी में ईसकै सूं वधनै कोई बळत नी व्हे अर उणमें बदळै री भावना रौ कोई पार नी व्हे ” (नीति व 6:34) . काम धन्धा या जीवण री दूजी वातां में बळत सूं अणूती तकलीफ अर घिरणा नीपजै, अठाताई 'क ईसाई कामगार, भगत, धरम उपदेस देवण्या अर मिन्दर चर्च रा पुजारी पादरी तकात नें बळत सूं छुटकारौ नी मिळै . वां माथै लगोलग निजर राखणी जरूरी है . वां नै हरमेस परमेसर रा हेत रौ सनेसो मिळतौ रैवणौ जरूरी है नींतर हिया री बळत कर वे परमेसर सारू कदास काम रा नीं रैवेला .

7. **मींड़कौ** : धन सूं हेत नै लोभ जिसा पाप बतावै जिणसूं सारा दुराचार नीपजै (1 तिमू 6:10) . कांगो देस में अनाप सनाप डेड़रा अँड़ा व्हे जका मुतबातिर हजारूं कीड़ा खायां जावै जठै ताई वांरो पेट नी आफरै अर मर नीं जावै . लोभी जीव खोटा खरा रस्तां सूं पईसा कमावता रेवै पण कीणी गरीब-गुरबा नें फूटी कौड़ी देवण में नीं समझै . प्रभु ईसू खुद कैयो- “ धरती माथै धन-सम्पत भेळी

मत करौ . धन में लेवौ लाग जावै 'क काट परौ आवै नीतर धाड़ैती लूट भागै . जे धन भेळौ करणौ व्है तो सुरग सांरू संचौ जिणरै न लेवौ लागै न काट आवै अर न उणनै धाड़ैती खोस सकै . वो धन यूं रौ त्यूं रैसी'' (मत्ती 6:19-21) . आकाण अर उणरा परवार माथै लोग भाटा बाया क्यूं कै वे फकत सोने-रूपै अर गाभा-लत्तां सूं मोह पाळियौ (यहोशू० 7) . प्रभु ईसू रौ चेलौ यहूदो इस्करोती पईसां रै ठोभ खातर खुद गळफांसी खावी . पईसां लारै वो आपरै मालक अर प्रभु रौ बिसवास तक गमाय दीयौ . न तो सोने में खराबी व्है न धन में . खोट तौ व्है उण मिनखां रै हियै जकां मांय लोभ लालच अर वासना वसियोड़ी व्है .

न्यारा न्यारा तबकां नै जातां रा लोग, हजारूं मरद-लुगायां रातूरात धणी होवण रै चक्कर में घोड़ा कै कुत्तां री होड़ां या जूआ-फाटकां में परवार तकात रा नास कर मेलै . बिना मैनत धनरै चक्कर में वे चोरी, हित्या अठै ताई आतमघात जिसा कुकरम भी कर मेलै . लोभ अर धन रे लालच रा घणकरा संगी व्है : जियां मोजीज बाजण कै ताकत री हूंस . भलाई वा दूजां माथै राज करण सांरू व्हौ कै पछै धन री ताकत सूं गरीबां नै दबावण री मंसा या 'धरमधजा' बाजण री इच्छा जकी परमेसर री बजाय मिन्दर गिरजे री घणी परवा करै . ईसू केवै- "सावचेत रेवौ अर खुदनें लोभ सूं छेटी राखौ क्यूं कै मिनखाजूण वां चीजां सूं नी बणै जकी मिनख भेळी करै नै किताई मालदार व्है जावै'' (लूका 12:15) . मालदार री कथा यूं केवै- "अेक मालदार री जमी घणी उपजाऊ ही'' . वो सोचण दूकौ 'क म्हारै ईधक धान नें मेळण री जागा नी है सो उणरौ कांई करूं? वो सोच्यौ 'क म्हारा भखार तोड़परा नें वड़ा करायदूं पाछै चूकतो धान अर दूजी चीजां उठै धरायदूंला . पाछै खुदोखुद नै कैवूंला "भागवान, थारै कत्रै बरसां नी खूटणवाळौ खजानौ है . खाय-पीय और मौज माण'' . पण परमेसर पडूत्तर दीयौ 'क हे गैला, थूं आज रातरा प्राण छोड़ देवेला पछै अै चीजां जकी थूं भेळी करी वांने कुण वरतैला ? "परमेसर री निजरां में इणसा भागवान मिनखा रौ औहीज मोल व्है'' (लूका० 12:16-21) . "मिनख कदास आखी दुनियां जीतलै पण खुद रा पिराण गवावें तो उणनै कांई हाथै लागै?" (मरकुस 3:36) . "सो म्है

केवूँ 'क न तो खावण सांरू फिकर करौ न गाभा वास्तै बल्कि परमेसर रै राज रौ ध्यान करौ, वो सारी चीजां पूरैला . क्यूँ कै जठै मिनख रौ धन वठै माथै उणरौँ ध्यान रेवै'' (लूका० 12:22-34) .

8. **सैतान** : जकौ झूठौँ अर सकल झूठ बोलणियाँ रौ बाप है, जको सगळा नै पाप करावै अर मिनख रै मन माथै राज करै . ईसू केयौ, "थे थारा बाप सैतान रा टाबर हौ 'क जैरी मंसावां पूरणी चावौ . सैतान सदीव सूँ हित्यारो है अर कदैई सांच कानी नी रेयौ . क्यूँ कै उणमें सांच रौ कदास अंस नीं है . जदै भी वो कूड़ . बौलै, वो आपरी कुबाण निभावै . वो झूठौँ अर झूठ रौ बाप है'' (यूहन्ना 8:44) . न्हानौ अर वड्डो झूठ बरोबर व्हे पण वो अेड़ौ वाणियोड़ो रेवै 'क जाणै सांचौ है . परमेसर झूठ नीं बोल सकै और न उणरा सांचा भगत विश्वासी (तीतुस 1:2) . "जे कोई कवै 'क आपा उण सागै सीर कबूल करां अर खुद अन्धारा में हालां तो आपां झूठा हां नै सांचै मारग नीं हालां'' (1 यूहन्ना 1:6) . भिस्ट बुध रा मिनख, जादूगर, कुकरमी, हित्यारा, मूरतां पूजणियां अर झूठा सदीव सरग सूँ बाँरे रैसी (प्रका०वा० 22:15) . "परमेसर झूँठै साखी सूँ घिरणा करै जकौ अेक लारै अेक झूँठ बोल्यां जावै'' (नीति० व० 6:19) .

9. **तारौ** : दरअेक मिनख रै हियै में उपज्यौ विवेक वतावै . अठै इण चितराम रौ तारौ मिनख रै हिया री असुद, कुकरमी, अर बुरी दसा बतावै जको जाणतो हिमझतो नित नवा पाप करनै आन्धौ, पापी और मरचोड़ो व्हे जावै . जाणतां पाप करचां मिनख अेड़ो आंधौ व्हे 'क उणनै खुदरा खरा-खोटा करमां री पैचाण नीं व्हे . उण रौ चित ठाणै नीं रेवै अर कदास वो चिन्ता में डूब्यौ रेवै . अेड़ौ चित सायद बळतै लोह सूँ दाग्यौड़ौ लागै अर बिसवास री कमी सूँ उणमें चेतौ या सुद-बुद खूट जावै . कारण 'क आप झूँठी आतमां री सुणी, सैतान री वातां सही मानी अर कुटलाई सूँ झूँठ बोलण्या कपटियां सैती घणो हेत राख्यौ .

10. **आंख** : परमेसर री दीठ मिनख रा ठेठ हिया तांई पूगै . उणरी ज्वाला जैड़ी आंख सूँ की छानौ नीं रेवै . सो वो मिनख रा सगळा अन्दरूणी भाव अर विचार तकात जाणै . थारा कुकरम काळै किट अन्धारा में व्हे या घणा जंगळ, ऊँडै

खाड़ में या थैं कठैई करौ, उणरी दीठ सूं छाना नीं रैय सकै (दूजा चितरामां में आंख्या मिनख रै चैरा सूं परगट क्हेतां भावां नै दिखावै) .

11. **जीभां** : अगन जैड़ी लपलपावती छोटी छोटी जीभां पापी हियैरै च्यारूमेर (चितराम पेहलौ) दरसाई है जकी परमेसर रा हेत नें परगट करै . परमेसर पाप सूं तो नफरत करै पण मिनख सूं हेत करै . वो पापी री भी मिरतु नीं चावै, पण चावै 'क वो मिनख पाप सूं अळगौ रैय नें जीवै . (2 पतरस० 3:9) . ईसू प्रभु पापियां नै उबारण सांरू जलम लीनौ . जद भी कोई पापी आपरा कुकरमां सांरू पिछतावौ करै बीं बगत सुरग में उणरौ हरख मनाइजै (लूका 15:7) . न्हानी न्हानी जीभा ईसू मसीह रै रगत नें भी बतावै . "ईसू परमेसर री लरड़ी जकौ जगत रां पाप उठाय नै जावै क्हे" (यूहन्ना 1:29) .

12. **सरगदूत** :- परमेसर रा वचन नै बतावै . परमेसर री मंसा है 'क वो पापां सूं भरमायां अर दबियोड़ा सगळा मरद-लुगायां सूं बन्तळ करै . जिण सूं वे लोग पाप रौ पिछतावौ करै - परमेसर रा हेत अर जोत नें हियै में आवण दै .


13. **कबूतर** : पवीत आतमा रौ सैलाण; उण आतमा रौ जकी परम सांच नै बतावै . वा आतमा पाप अर पुत्र रौ भी खुलासौ करै . वा पापी सामे परमेसर रै न्याव रौ खुलासौ करै (यूहन्ना 15:26) . अठै (चितराम में) पवीत आतमा नै हियै सूं बारै देखाई है . वा पाप रै भेळी वासौ नीं कर सकै .

जे थारौ हियै मांये हालात भी इण चितराम वाळै जैडौ क्हे तौ प्रभु नें हेलौ पाड़ौ, थारौ हियौ विणरै सांमी उघाड़ दौ अर उणमें परमेसर रा वचनां रौ चानणौ होवण दौ . "प्रभु ईसू माथें विसवास करौ, थारौ मुगत क्हे जावैला" (प्रेरितो० 16:31) . हां, या बात सांच हैं 'क परमेसर थाने नुवो हियौ नै मुगज बगसण रौ वांदौ करियौ है (यहेज० 11:19) . आ वात दूजै चितराम में खुलासै कीवीहै .

दूजौ चितराम

औ चितराम मिनख रै पिछतावतै हियै रौ है जकौ परमेसर रा दरसण री उड़ीक में है . सरगदूत रै हाथ में तरवार है जकी परमेसर रौ वचन है . "परमेसर

रौ वचन जीवतो जागतो नें दोधारी तरवार सूं भी चोखौ है . ओ वचन जीव अर आतमा नें; गांठ सूं गांठ नें न्यारी कर बींध न्हाकै . ओ मिनख रै मन अर भावां री परख करै” (इब्रा० 4:12) . परमेसर रा वाचा उणनै याद अणावै “पाप री मजूरी मिरतु क्वै” (रोम 6:23) . भळै “हरेक नें फकत अेकर मरणौ क्वै उण



2

दूजौ चितराम : पाप सूं पिछतावतो हियो

केड़ै परमेसर कानी सूं उणरौ न्याव व्हेणौ तैसुदा है” (इब्रा० 9:27). परमेसर माथै अभरोसौ करण्या अर पापियां सांरू बळती अगन अर गिंधरफ़ री झील कूदण वास्तै पाती आवैला (प्रका० वा० 21:8) .

पापां नै पिचाणतौ हियौ


सरगदूत रै दूजे हाथ में मिनख री खोपड़ी है जकी पापी ने याद दिरावै ‘क सगळ्ठां नें मरणौ है . आपणी देह जिणनै आपां अणूतौ हेज करां, खवावां-पिवावां, चोखा गाभा पैरावां नै सवांरा ताकी सरीर री इच्छावां अर कामनावां पूरी व्हे जावै. पण अेक दिन औ सरीर मर परौ जावैला, धरती रा कीड़ा मकोड़ा इणनै चट कर जावैला . लारै जीवता रैसी पिराण अर आतमा जका अेक दिन न्याव सारू प्रभु ईसू सामां हाजर व्हेला (2 कुरि० 5:10) .

अठै आपां देखां कै पापी मिनख परमेसर रै सनेस माथै ध्यान देणौ सरू करै. वो परमेसर रे हेत सांरू खुदरौ हियौ उघाड़ै . पवीत अतमा उणरा पापी अर काळा हिया में पळकण लागै . परमेसर रौ चानणौ उणरा मन मिन्दर में वड़ अंधारा नै बारै काढ़ देवै . पाप जिणनै अठै भांत भांत रा जिनावरा रा रूप में देखाया है, भगण ढूकै . प्रभु केवै, “मैं जगत री जोत हूं . जकौ म्हारै लारै चालै वो कदाई अंधारै में नी रैसी” (यूहन्ना 8:12) . थें थारौ या लोगां री बुध सूं या खुद री कोसीस सूं यां पापां नै हियै सूं बारै नी काढ़ सकौला . सैसूं सरळ, पक्कायत, जलदी नै असरदार तरीकौ फकत अेक है . आप प्रभु ईसू नें; जको परम जोत है, हियै में आवण दौ ताकि पाप रूप अन्धारौ खुद बारै निकळ जावै . चन्दरमा नै तारा अन्धारी रात में चानणै सूं थोड़ी मदद करै पण सूरज ऊगां आपोआप अन्धारौ अर चांद-तारां रौ मुदरौ चानणौ दोन्यू न्हाट जावै . प्रभु ईसू धरम रौ सूरज है . जद वो येरूसलम रै मिन्दर मांय बड़ियौ, उठै विणज करतां सगळा नै बारै भगाय दीया . वो पईसां रा लेण-देण करण्या री टेबलां ऊंधी करदी . कबूतर बेचणियां रा तखत न्हाक दीया और अेलान कीयौ “म्हारौ घर भजन करण री ठौड़ है पण थे इणनें चोर-धाड़ेतियां रै लुकण री खोह बणा न्हाखी हौ” (मत्ती 21:13) . थारौ हियौ परमेसर रौ घर व्हेणौ चाहिजै; उण रौ मिन्दर .

परमेसर इण में रैवणी चावै, इणनै खपसूरत बणाणी चावै, इणमें चानणौ भरणी चावै . वो इणनै अर हरख हेत सूं पूरणी चावै . ईसू कोरा आपणा पापा री माफी देवण खातर नीं आयौ है . वो तौ आयौ है देवण नें सगती जकी आपानें पाप रै राज अर वारी सगती सूं मूगत कराय सकै . “ जे थाने परमेसर रौ टाबर (ईसू) मुगत करावै जद ही थे साचांणी मुगत क्हाँला ” (यूहन्ना 8:36) .

तीजौ चितराम

औ चितराम बाकेई कळपतै पापी रै दियै गे है . अबै वो घणकरा पापां सूं नफ़रत



तीजौ चितराम : पाप सूं पिछतावतौ हियौ

करै जका ड़रावणा है और जिणां रै कारणै प्रभु ईसू सूळी चढ़ियौ . ज्यूं ही उणनै सरगदूत (जकौ परमेसर रौ वचन है) कूस रा दरसण करावै; कूस निजर आवतां ही पापी रौ पिछतावतौ हियौ तिडक परौ जावै . आपरा कीयौंड़ा पापं सांरू उणनै ऊंडी चोट लागै . ज्यूं ही वो ईसू जरिये दुनियां में परगट परमेसर रै बढतै घणा हेत नै मैसूस करै, उणरौ हियौ पिघलण दूकै . खासकर जद उणनै आ ठा पडै कै परमेसर रौ पूत ईसू खीस्ट उणरा इतरा पाप इठावण सांरू आयौ और उणरी जगां सूळी चढ़ मरियौ .

आ पक्कायत है कै ईसू रै कोड़ा पड़िया, काटां रौ मुकट उणरै माथै धरीजियौ, उणरा हाथां पगां में परेका जड़ी और आपणा पापां सांरू सूळी चढ़ प्राण दीया. अै सगळी वातां सुभट अर ऊंडाई सागै पिछतावण्या मिनख रै हियै माथै असर न्हकै . उणरौ जीवण अर हिबड़ौ तकात बढळ जावै . ज्यूं ज्यूं वो परमेसर रै वचन नै बांचै वो खुदनै आरसी में देखण दूक जावै . उणनै सुभट लखावै 'क वो परमेसर सूं घणौ अळगौ व्हेग्यौ नै उणां रा हुक्म नीं मान्या . उणनै अणूतौ पिछतावौ व्हे अर जद वो रोवतो थकौ परमेसर सांमी आपरौ हियौ उंधाय दै तद ईसू प्रभु भी उणरै नैडौ आवै . परमेसर रौ हेत अर सांयत उणरै हियै वापरण लागै, वो मैसूस करण दूकै **“परमेसर रै पूत ईसू रौ रगत आपाणै सारा पापां सूं सुद करै” (1 यूहन्ना 1:7)** . “हे परमेसर म्हारे हिया नें पवीत करौ नै उणमें सामधरमी आतमा थरपावौ” (भजन 51:10) . भळै परमेसर फरमावै “म्है वांसू राजी रैवू जका दीन है अर खोटा करमां सांरू पिछतावै, जका म्हारौ भौ राखै नै म्हारौ कैयोडौ करै” (यशाया^० 66:2) . पवीत आतमा ईसू रा वचन साफ सबदां में उणनै सुणावै “हीमत राख म्हारा टाबर, थारा पापां सांरू माफी बगस दीनी है” (मत्ती 9:2) . जरै कि वो अेक निजर सूं ईसू री सूळी अर वारां रगत कानी लगोलग देख रहचो है जठै ईसू उणरा पापां रै वदळै में आपणो रगत चढ़ायो अर देवलोक व्हेयौ . अबै उणनै लखावै 'क पापां रो बोझ हळको व्हेगौ क्यूं कै ईसू उणरा पाप, दुख, रंज सैया खुदरै ऊपर लेय लीना . “वोहीज ईसू

आपाणै दोखां कारणै घायल करीजियौ, वो आपणां अधरमां लारै किचरीजियौ. परमेसर आपाणा अधरम री सजा ईसू माथै चाढ़ दी''(यशा० 53).


अबै पवीत आतमा और परमेसर रो प्रेम पछतावतै सुद हियै माथै पूरौ हक राखै . हियौ जाणै 'क प्रभु ईसू री मया सूं उणरा पाप माफ व्हेगा है, अबै वो पक्कायत मानै 'क **जकौ ईसू रौ भरोसौ करैला उणरौ नास नी व्हेला अर वो अणत जीवण लेवैला (यूहन्ना 3:16)** . उणरी आतमा री गवाही पवीत आतमा देवै 'क उणरा पाप माफ व्हेगा और परमेसर री मया सूं उणरौ टाबर गिणीजण लागौ है (रोमि० 8:16) . ईसू रौ रगत म्हानै मुगत कराय दीया, म्हारा खोटा कीयोड़ा री माफी ईसू री मया सूं मिळी है (इफि० 1:7) . मिनखा देह री इंच्छावा रूपी पापां री बजाय अबै परमेसर सांरू जीवण अर उणरी सेवा री मंसा लगोलग पक्की तेवड़ीजण लागी है, उणसांरू "जकौ पैला आपांसू नेह कीयो" (1 यूहन्ना 4:19) . अबै वो दुनियां या दुनियांदारी सूं मोह करण री बजाय परमेसर अर उणरी चीजां सूं हेत करण लागौ है .

इणी कारणै इण चितराम में आपां देखां 'क पाप रा पूतळा जिनावर हियै रै बारै न्हिकळगा है भलाई सैतान आपरी ठाँड़ छोड़णनै त्यार नीं है . वो मोकौ जोवै अेकर भळै मांय बड़ण रौ . इणी कारण प्रभु ईसू केवै 'क सावचेत रैवो नै अरदास करौ 'क सैतान छेटी परौ रैवै नै न्हाट जावै (याकूब 4:7) .

चौथौ चितराम

औ चितराम उण मसीही विस्वासी अर सन्त रौ है जकौ प्रभु अर तारणवाळै ईसू रा त्याग सूं पूरी सांयत नै मुगती लेय चुक्यौ है . अबै वो किणी बात री बढाई नीं करै "सिवाय प्रभु ईसू री सूळी री . उणरी सूळी रै कारणै आपां दुनिया सांरू मरगा नै दुनियां आपां वास्तै मरियोड़ी है" (गला० 6:14) . ईसू सूळी माथै इणी वास्ते चढियौ 'क आपां भी पाप सांरू मरां नै धरम सांरू जीवां (1 पतरस 2:24) . अेक सांचो मसीही दुनियां वास्ते मरचोड़ो व्हे है . म्हानै हुकम हुयौ 'क आतमा रै मुजब्र हालतां नै देह री मंसावां नै कत्तई पूरी नीं करां (गला० 5:16,25) .

जिण थम्बा सूं गाभा उतारियां केडै प्रभु ईसू नें बांधियौ वो इण तसबीर में देखायो है . जिण कोड़ा सूं प्रभु ईसू नें मारियौ, वो भी अठै चितराम में है . उणने आपणा पापां लारै मीरयौ नै घायल कीयौ, क्यूं कि “उणरी सजा सूं आपणा पीड़ां ठाड़ी पड़ै” (यशा० 53:5) . हेरोड़ अर उणरा सिपाई ईसू री खिखरा उड़ाई. कोड़ा मारियां पाछै उणरै माथै कांटा रौ ताज धरियौ हालांकि वो सोना रौ ताज पैरण रौ हकदार हौ . उणरै हाथ में बादशाही डण्डै री बजाय डोकौ झेलायौ नै मसखरी में केयौ “अे यहूदियां रा राजा थारी जै हो” . पाछै उणी



चौथौ चितराम : मसीह रें साथै मरण

डोकै सू उणरौ माथौ कूट्यौ . बेसरमी अर बेरहमी सू खिखरां करता ईसू नें सूळी चढ़ावण खातर बारै परौ लेग्या (मत्ती० 27:27-31) .


घणकरा मिनख नांव रा भगत 'क मसीही व्है जका गिरजाघरां अर मिनदरां में प्रार्थना करै, प्रभु रै जीमण री मेज में सरीक व्है, परमेसर रा हरजस गावै पण आपरा खोटा करमां सू प्रभु ईसू नें दुख देवै . उणनै भळै सूळी चढ़ावै (इब्रा० 6:6) . "जकाँ ऊपरला मन सू प्रभु प्रभु करैला उणनें सरग में नीं आवण दैला पण जका म्हारा सरग रा पिता रै कैया मुजब हालैला वे सरग पावैला" (मत्ती 7:21-22) .

इण चितराम में अेक धन री कोथळी भी दीसै जकी यहुदा री है . यहुदा रूपै रा तीस टुकड़ां खातर ईसू नें बेच दीयौ . धन रौ लोभ उणरै हियै चढ़ग्यौ पाछै वो दूजी कोई वात बिचारण जैडौ नीं रेयौ . लालटण नें सांकळ वे सिपाई वरती जका ईसू नें रात रा पकड़ियौ . पासा जका जूवै में वरतीजै, सिपाई इण सांरू वरतिया कै ईसू रा गाभा कुण लेसी ? "वे म्हारा गाभां रौ जूवौ खेल्यौ अर बंटवाडौ कीयौ" (भजन० 22:18) . सिपाई ईसू री सगळी चीजां काबू करली पण उण खुद नै औ कैय टाळ दीयौ "म्हे नीं चावां 'क औ मिनख म्हारौ राजा बणै" . मिनख मातर परमेसर री मया पावणी चावै, मेह अर सूरज रौ चानणां चावै पण खुदोखुद नै प्रभु परमेसर री सेवा चाकरी अर जीवतै राज सू अळगाँ राखै . घणकरा मिनखां नै पीड़ कै तकलीफ री बगत हीज परमेसर याद आवै . सिपाई भालै री अणी सू ईसू री पांसळियां नै हियै माथै घोदा कीया . "तुरत रगत नै पाणी बारै आयौ" (यूहन्ना 19:33-37) . कूकड़ै री बांग सू पैला पतरस तीन दाण ईसू नै पैचाणण सू नटग्यां पाछै तो वो घणां रोयौ नै कूक्यो- कळपियौ (मत्ती० 26:69-75) . काँई थे चवडै - धाडै कबूलौ 'क थें थारा हिया प्रभु ईसू नै अरपण करदीना ? इणनै फकत कैयां नीं, करमां सू वतावौ . ईसू केयौ "जे कोई मिनखां सामी म्हनै मानैला, म्है उणनै म्हारा सरग रा पिता सांमी मानूला . पण जकाँ म्हनै लोगां में इनकार करैला, म्है उणनै सरग रा पिता सांमी नकारूला (मत्ती 10:32.33) . ईसू भळै केयौ "जको आपरी सूळी तोक्यां म्हारै लारै

पावंडा नी भरै वो म्हारौ चेलो बणवा लायक नी है” (मत्ती 10:38). धन्न है
वे जका उण चट्ण माथे थिर ऊभा रेवै जिणरौ नांव ईसू मसी है .

पांचमो चितराम

परमेसर री अथाग दया-मया कारणै बच्चियोड़ा पापी रै सुध्ध होयोड़ै हियै
रौ औ चितराम है . अन्नै औ परमेसर रौ सांचौ थान है . पिता परमेसर . पुत्र परमेसर



पांचमो चितराम : परमेसर रौ मिन्दर

अर पवीत आतमा रौ वासौ . प्रभु ईसू रौ वचन है “जकाँ भी म्हारै सूँ हेत करसी अर म्हारी वातां मानसी, म्हारा पिता उणसूँ हेत राखैला . अठातांई ‘क म्हारा पिता अर म्है उण सागै रैवण आवांला” (यूहन्ना 14:23) . परमेसर ईसू रै जरिये मिनख रौ मान बधावै, उणनै आसीस देवै नै उणनै ऊपर उठावै (लूका 1:52) .

अबै औ हियौ परमेसर रौ सांचौ मिनदर बणग्यौ है . हियै सूँ सगळा पाप बरै कढ़ग्या . झूठ रै बाप सैतान रा सगळा पापरूप जिनावरां रै बदळै हियै में अबै पवीत आतमा, सांच रौ वास नै राज है . पाप उपजावण रै कारखानै री ठौड़ अबै हियाँ फूटरौ लागै, फळां रौ रूख कै बाग दाई लखावै जिणमाळै आतमा रा फळ जियां हेत, आनन्द, मेळ, धीजौ, सांयत, सबूरी, दया, भलापणौ, विसवास, निबळाई रा फळ लाग्योड़ा है जका सूँ परमेसर अर मिनख राजी रेवै (गला० 5:22-23) . अबै वो हियाँ दाखां री वेल री डाळी बणग्यो है और वा वेल है खुद प्रभु ईसू . इण ड़ाळ माथै लगोलग फळ लागण रौ कारण है उणरौ प्रभु ईसू सूँ जुड़णौ, ईसू अर उणरा बचनां रौ उठै रेणौ (यूहन्ना 15:1-10) . बपतिसमा लीयां अर पवीत आतमा सूँ भरियां केडै वो मिनखांपण री इन्छावा अर वासनावा रौ मुकाबलां कर वानै परी मारै (गला० 5::24) . उणरै जीवण रौ गाड़ोलौ पवीत आतमा हलावै सो वो मिनखजात री इन्छावा रै काबू नीं आवै (गला० 5:16) . अबै वो सरीर खातर देख, सुण या मैसूस करनें वास्ते नीं जीवै. वो जीवै परमेसर माथै विसवास सूँ . “म्हे दुनियां नै म्हारै विसवास सूँ जीतां” (1 यूहन्ना 5:4) . उणरी आस जीवै कै वो भळै आपरा प्रभु ईसू री मैहमा देखैला: वो जीवै परमेसर रा प्रेम में जकाँ कदाई अलोप नीं व्है .

“खुस वे है जकां रा मन साफ है. वानै परमेसर रा दरसण व्हैला” (मत्ती 5:8) . राजा दाऊद आखी दुनियां जीत्या पळै, अखूट धन-सम्पत व्हैता पाण भी जाणतौ ‘क सगळां सूँ भारी जुद्ध तौ उणरा हिया में व्है . आतमा री आवाज ओळख्यां वो अरदास करी “हे परमेसर, म्हारौ हियौ निरमळ कर और म्हारै मांय नुवे सिरै सूँ आतमा थापन कर” (भजन 51:10) . कोई मिनख खुदोखुद


मन साफ नीं कर सकै, इण खातर राजा दाऊद ज्यूं पिछताय नै प्रभु नै हेलौ पाड़णौ पड़ै . परमेसर आपरै जीवण में की नुवौ काम करणी चावै . परमेसर री दीठ में मिनख रौ धरमीपण मेलै चीछरै दाई व्है सो वो आपणै हियै में परमेसर नें नीं थरप सकै . परमेसर आपरी मदद सांरू त्यार है . वो खण लीयौ" म्है थां माथै पवीत जळ रौ छांटौ दूला अर थे सुध्थर व्हे जावौला . थारी सुध्थरी व्हे जावैला मूरतां सूं अर सगळा पापां सूं . **म्है थानें नुवो हियौ अर नुवो मगज बगसूला . थारौ भाटै जैड़ो काठौ हियौ ले लूला नै बदळे में आज्ञाकारी हियौ दूला जिणमें म्हारी आतमा रौ वासौ व्हैला .** म्है थां माथै निज़र राखूला अर तैसुदा थे म्हारौ हुकम मानौला (यहै 36:25-27) . औ बाईबल परमेसर रा वचन रै नुवै नेम रौ सनेसौ है जको परमेसर आपरे बेटे ईसू रै जरिये आपाने दीयौ है . पाचमें चितराम में आपां भाळां कै अबै सरगदूत पाछौ बावड़ै . सरगदूतां रौ काम व्है "उणा री रक्षा नै खतरां सूं बचाणौ जका परमेसर रौ मान राखै" (भजन 34:7; 91:11; दानि 6:22; मत्ती 2:13; 13:39; 18:10; प्रेरितो 5:19; 12:7-10) .

इण चितराम में सैतान भी है जकौ हियै रै नजीक ऊभौ है - जाणै मांयनै वड़ण रौ मोकौ ताकै जठै वो पैला रैवतौ . इणी सांरू आपाने भोळावण व्है "सावचेत रेवौ अर भाळौ, थारो दुसमी सैतान गरजतै न्हार दाई घूमतौ रेवै नै जोवै 'क किणनै फाड़ खाऊं'" (1 पतरस 5:8) . घणीदाण वो चानणा रै सरगदूत रौ भेख धार परमेसर रा टाबरां नै दुनियादारी रौ लालच देवै . अठांताई 'क चुणिया थका मिनखां नें भी चालाकी सूं भिस्ट करण री कोसीस करै . जे आपां सैतान रै सामां मंडा तो व्हो न्हाट परे जावै (याकूब 4:7) .

छठौ चितराम

औ वेर वेर फिसलणियै अेक मिनख रौ दुखी चितराम है . उणरी अेक आंख मीचीजण लागी है जकी प्रगट करै 'क वो आपरा विसवासी मसीही जीवण में

ठाड़ौ व्हेगो है नै निचेत सूतौ है . उणरी दूजी आंख बेसरमी सूं च्यारूमेर भाळै जकी दुनियादारी सूं हेत प्रगट करै . मांयरी चानणौ मगसौ पड़गौ है . हियै री वा तसबीर जिणमें वो प्रभु ईसू सागै दोरौ वगत काढण नें त्यार हौ, हेटै पड़गी है . वो च्यारूमेर लालच सूं घिरचोड़ौ है जिणसूं छूटण री बजाय वो फंसतौ लखावै . परमेसर रा वचनां री ठौड़ वो अबै सैतान रा झूंठा थथोपा नै चालाक



छठौ चितराम : लुभणियो अर बटचोड़ो हियौ

सलाह सुनै . भलैई वो हालताई रोज़ मिन्दर - गिरजाघर जावै नै धरम री ओट में संसारी लोभ-फरेब री मंसावा छिपायोड़ी परी राखै पण परमेसर सांरू हेत उणरै हिया में ठांडौ पड़ग्यौ है . वो दो मारगां बिचाळै पाथरौ ऊभौ है . दुनियां री चीजां री लालसा करै पण देखावण नै परमेसर सूं प्रीत रौ झूठौ नाटक करै . उणरै हियै में विवेक रौ चेतन तारौ फीकौ पड़ग्यौ है . अबै वो सूळी तोक्यां मुळकै नीं, उणनै वो माड़ाणी रौ घणौ दोरो काम लागै . उणरौ बिसवास डिगण दूकचो . प्रार्थना रै जरिये वो परमेसर सूं अबै वंतळ नी करै क्यूं के अबै वो आपरै हियै रै हाल सूं बेफ़िकर नै बेमतलब होग्यौ . उणरै ज़िन्दगी में बारै ऊभै सैतान हियै में ठौड़ करण लागौ है . परमेसर रा सांचा टाबरं री बजाय उणनै पापियां री सौबत चोखी लागै .

घमंड रौ पूतळौ मोरियाँ अेकर भळै हियै में वड़ण री चेस्टा करै . वो आ पांतरग्यो 'क परमेसर री मया सूं वो बचियाँ हो पण अबै वो अेक घमंडी पोपलीला करणियो बणग्यौ है . दारू री तलब उणरै हियै रौ आड़ौ भचीड़ै . सैतान उणनै बतावै कै खास टाणां दुनियांदारी रा मिन्तां री सौबत सूं उणरा आतमा रा जीवण में कोई फरक नीं पड़ैला . वो संसारी कामनावां अर मंसावां नै हियै में मैसूस करण लागौ है . उणनै झूठ, गॉल, देखावटी वातां अर सृगली मज़ाका रौ आनन्द आवै . गिन्दा चितरामां नै वो घड़ी घड़ी देखै नै मजा लेवै, ग़लत सौबत उणनै आछी लागै, नाच-गाणा चोखा लागै नै सैतान री सीख 'क अै सगळा लखबण मिनख सुभाव में वाजब व्हे नै अेकाधै पाप सूं की फरक नीं पड़ै ! आ वात वाजब है 'क सृगला अर खोटा विचार रूपी गिरजड़ां नै आपणै ऊपर भमण सूं नी रोक सकां पण आपां पक्कायत दोग्खी व्हे जावा जे उणाने आपणां हियां मांय घोंसळा मांडणदां नै खुद वारै कायजै व्हे जावां . पाछै वे भूंडा विचार रूप ईड़ा देता रेवै . जे आपां सैतान नै छिट्टड़ी आंगळी पकड़ण री छूट दे दां तां वो आखै हाथ झाल आंपाणी जीव अर आतमा नै अणूतं लाबि घोर नरग में परौ न्हाकै . इण सांरू परमेसर री दवायती कानी ध्यान दौ 'क आपां मोटचारपणा री मंसावां

सूं अळगा रैवा नै पाप सूं नी रम्मां भलाई वो किणी रूप में व्हे . प्रभु ईसू कानी न्हाटौ जको साय करण्याँ नै बचावण वाळौ है .

इण चितराम में अेक मिनख हियै माथै छुरौ मारै . औ सांचा बिसवासी मसीही री खिखरां करण्या नै विरोधियां नै परगट करै . वे आपरी कूड़ी जीभ अर कपटी होठां सूं मसीही भगतां रै हियां माथै घाव करै, हमला करै ताकि वां में फूट पड़ै नै वारौ नास परौ व्हे . अबै वो फिसलणियो मसीही परमेसर रै डर री बजाय मिनखां सूं डरण दूकै . सोचै, मिनख उणसांरू कांई कैसी 'क करसी. वो मिनखां रौ दास वण जावै नै परमेसर सूं छेटी व्हे जावै . निरासा अर अभकाई में उणनै रीस आवण लागै जकी हियै चढ़जा . दूजां री खुसी सूं बळतरूप रौ सरप बिना वतायां मांय घुसण लागै . जे उणनै आधौ मोकौ दे दौ तो वो पूरौ किवाड़ खोलनें घमंड नै घिरणा उपजावै .


परैसां रौ लोभ हियै में घुसणौ घणौ सोरौ व्हे इणी कारणै प्रभु ईसू चेतावै "भाळता रौ नै भजन करता रौ ताकि लोभ में नी पड़ौ" (मत्ती० 26:4) . "जकाँ सोचै 'क म्है थिर ऊभौ हूं वो सावचेत रेवै 'क कठैई . गुड़ नी जावै'" (1 कुरि० 10:12) . आपानै परमेसर रा बगस्योड़ा आतमा रां हथियारां सूं लैस रैवणौ है ताकि सैतान री खोटी चालां सांमी जोर सूं मंड सकां (इफि० 6:11-18) .

सांतमौ चितराम

औ चितराम उण मिनख रौ है जिणरौ हियौ लारै फिसळगौ जको किणी बगत परमेसर री रोसनी, सरग री आसीस, अर पवीत आतमा पावी . वो परमेसर रा सपूत प्रभु ईसू रै जरिये मुगती सांरू समझदार हौ पण अबै वो बिसवास छोड़ परौ दीयौ (इब्रा० 6:4) . तसवीर उण हियै री दसा भी देखावै जकाँ कदास नीं पिछतायौ हालाकि धरम रै 'आळै आणन्द समंचार' सूं वो वाकिफ हौ . परमेसर जद बतळावै पण मिनख रौ हियाँ करडौ रेवै, उण री दसा खोटी सूं खोटी आवै, भलांई वो खुद नै बदळण रां बेमतलब घणा ताखड़ा तोड़ै .

लारै फिसलणियै री दसा प्रभु यूं बतावै "जद खोटी आतमा मिनख सूं

न्हिकळै तो विसराम तांई वा सूखै थल कार्नीं ठौड़ जोवै . पण जे ठौड़ नीं लाधै
जद केवै, 'म्है पाछी म्हारी जूनी ठौड़ परी जाऊंला'. पाछी गयां उणनै वा मिनख
रा हिया रौ घर साफ दीसै . वा भळै फेर जावै नै खुद सूं भी बेजा सांत दुस्त
आतमावां नै घेर लाय, अर उण घर में वासौं कराय दै . इण पाछै मिनख री दसा



7

सांतमौ चितराम : फिसल्यौड़ौ 'क नकटौ हियौ

सरूपांत सूं वत्ती खराब व्हेजा” (लूका 11:24-26) . अँडा मिनख रौ काँई व्हे, आ बात आगै मांडचोडी कैणावतां माथै खरी उतरै . “गिंडक खुदरी ओकारी चाटै, सूरडै नै घणा सिनान कराय दौ, वो तौ पाछौ कादैं में लुट्टैला” (2 पतरस 2:22) .

धरमसास्तरां में लारै फिसलणिया ‘क पापी रै अणपिछतावै वाळै हियै री दसा चोखी तरा समझायोडी है . पाप आपरी सारी धोखेबाजी रै पाण हियै में रैवण अर राज करण सांरू भळै वडग्यौ है . अठै ताँई कै मिनख रै हियै री दसा अब उणरा मूँडै दीसै . पाप नै पवीत आतमा भेळा नीं खटै सो पवीत आत्मा री निसाणी भोळौ कबूतर बारै काढीज रहचौ है . औ कत्तई नी व्हे ‘क मिनख रौ हियौ अकेसागै परमेसर रौ देवल भी व्हे नै सैतान रै लुकण री ठौड़ भी . परमेसर रै वचनरूप सरगदूत नै भी दुखीमन सूं बारै न्हिकळणौ पडै, पण वो पाछौ भाळै ‘क मिनख कदास पिछतावै – जियां गमियोडौ छोरू कीयौ “वो सूरडा खावै जकी फळियां तकात खावण सांरू त्यार हौं पण कोई उणनै की भी खावण नै नीं दीयौ . आखिर उणनै चेतौ बावड़ियौ जद वो बोल्यौ ‘म्है ऊठ परौ नें म्हारा पिता कन्नै जाऊँला नै केवूँला ‘क म्है परमेसर अर थारे सांरू पाप कीया . म्है थारौ पूत वाजण रै लायक नीं हूं” (लूका 15:16-20) . पिता छोरा नै पिछतावतौ देख उणनै माफ कर खुसी खुसी अपणाय लियौ .

इण चितराम नें देख्यां ठा पडै ‘क हियै में कदास सांचौ पिछतावौ नीं है अर नी पापा सूं परमेसर कानी मुडण री मंसा . प्रभु ईसू रा चरणां में माफी मांगण री इच्छा भी कोनी दीसै . अँडो लागै ‘क उणरै चेतै नें गरम लोखण्ड सूं दागियौ व्हे नै चुप कीयोडौ व्हे . उणरै कान तौ है पण वो प्रभु ईसू री नरम वाणी नीं सुणै . उणरै नेतर तौ है पण पगां हेटै बिना टूँडै रौ नरग रौ खाड़ उणनै निजर नीं आवै . उणनै अजैताँई पाप करण में सरम नीं आवै . सैतान उणरै हियै में राज करण सांरू राजा ज्यूं गादी माथै थापन व्हेगौ है . कदास वो चोखी वातां सूं बारै भलौ नै मौजीज दीसण री चेस्टा करै . वो धरमी दीसणी चावै जियां धोळौ

पोत्योड़ौ मकबरौ क्कै “जकौ बारै सूं फूटरौ दीसै पण मांयनै हाड़का नै सड़ती ल्हासां क्कै” (मत्ती 23:27) .


सांची आतमा री ठौड़ इण हियै में अबै झूठां रौ पिता सैतान है . अकू अक जनावर पाप परगट करै नै हरेक पाप महादुस्त नै खोटी आतमा रा हाथ पकड़ हियै में वासौ लेवै . हालांकि मिनख खुदनै सतावणवळी दुस्त आतमा सूं मुगत क्हेणी चावै पण वे उणनै अड़ौ बांध मेल्यौ है ‘क छूटणौ धणौ दोरौ दीसै . “जदैं कि मूसा रा कानून नीं पाळणियै नैं दो-तीन जणां री गवाही माथै बगर दया मार न्हाकै . पाछै कांई क्कै उणरौ जकौ परमेसर रा पूत नै किचर न्हाक्यौ ? परमेसर रा कौल रा वाने पवीत करण वाळै रगत नै साव सूंघौ गिणै ? मयावान आतमा री बैजती करै ? सोचौ, अड़ौ मिनख कैडै इंडं रौ भागी क्कै !” (इब्रा० 10:28,29;2 पतरस 2:1-14) .

साथिड़ां, जे औ चितराम थारै हियै री दसा सूं मेळ खावै, थे तुरत परमेसर नैं हेलौ पाड़ौ थारै हिवड़ा रै अन्तस सूं . “वो सदावंत सिमरथ है वाने तारण में जका प्रभु ईसू रै जरिये परमेसर नै ध्यावै” (इब्रा० 7:25) . जे थे सांचौ पिछतावौ करौ तो वो थारा पाप भूलण नै त्यार नै सिमरथ है . थें जे सांचै मन सूं चावौ तो वो सैतान नै रोक सकै, सगळा पाप रा पूतळां नैं थारा हिया सूं बारै काढ़ सकै . उण कोढ़ी मिनख ज्यूं आवौ जकौ प्रभु ईसू नैं कैयो, “हे प्रभु, थूं चावै तौ म्हारौ कोढ़ मेट सकै” . प्रभु ईसू उणताई करूणा रौ हाथ बधायौ नै पडूत्तर दीयो “म्है चावूं कोढ़ मिटजा (मरकुस 1:40,41) . जे थें फेरू करड़ाई पाळौ, चानणै करतां अन्धारौ चावौ तो न कोई आस है न मदद क्यूं कै थें जीवण री वजाय मिरतु चुण रहचा हौ- **पाप री मजूरी व्है मिरतु** (रोमि० 6:23) .

आंठमौ चितराम

प्रभु ईसू लारै चालण में टाळमटोळ करण्या, करडै हियै रै पापी मिनख रौ औ चितराम है जकौ मरण वाळौ है . वारौ आखौ संरीर पीड़ां भोगै नैं आतमा मिरतु रै भौ सूं कळपै . मिरतु (चितराम में हाड़का रौ ढांचौ) अचाणचक बेबगत

आय पूगी . पाप रा झुंठा सुख गळग्या नै सांमी दीसै ड़रावणी पाप री कीमत .
 सामी दीसै नरग री घणी पीड़ां . हालाकि अबै तो सांचै हियै सुं प्रभु नै भजणी
 चावै पर वो प्रभुनै भज नीं सकै. क्यूं कै केई बरसां सुं वो प्रभु रै नैडौ नी गयौ.
 उणरा मित उणरै पिलंग पाखती उभण सुं ड़रपै नै वारा थोशा सबद उणनै थावस



आंठमौ चितराम : पापी रौ न्याव

नीं देय सकै . अबै उणरी धन सम्पत उणरै जीवण रौ अेक छिण पल भी नी वधाय सकै, न उणरी आतमा नें बचाय सकै न आतमा री पीड़ घटाय सकै . सैतान उणनै परमेसर रौ ध्यान कत्तई नीं करण दै.


वे सगळी चीजां जकी उणनै व्हाली ही, जका सांरू वो जीवतौ, उणरी खिखरां करती लखाई . अठै तांई उणरा अभरोसै वाळा, फिरयोडै मन रा पुजारी पादरी कै गिरजै मिन्दर रा मुखिया भी अबै मदद नीं कर सकै क्युं कै वो परमेसर रै हेत नै ठोकर मारी ही नै अबै उणरै न्याव रौ बगत आय पूगौ है . वो मैसूस करण लागै “जीवतै परमेसर रै हाथां लगणौ घणौ खोटौ काम है” (इब्रा० 10:31) . वो इण आस में जीवियौ ‘क अन्त बगत आयां पेला जदे चावैला वो आपरो जीवण परमेसर नै अरण कर दैला पण अबै ठा पडै ‘क घणौ मौडौ व्हे चुक्यौ है . हजारूं हजार मिनख अचाणचक तुरत मर जावै अर वानें मिरतु रै मांचै परमेसर नें ध्यावण रौ कत्तई मोकौ नीं मिळै. इणी वास्तै औ जरूरी है ‘क आपां परमेसर नै अबार हीज याद करां जद वो आपां रै नैडो है . सारी उमर प्रभु रां प्रेम अर किरपा रा वचनां नें नटणियो पापी अबै परमेसर रा सायत अर बचावण वाळा वचनां रै बजाय मरती घड़ी आपरा न्याव करणवाळै रा बोल सांभळै “म्हारै सूं अळगा रैवौ; थारै ऊपरै परमेसर रा सराप री गाज पड़ी है . थे उण अणत भाड़ में परा जावौ जकी सैतान अर उणरां दूतां सांरू चेतायोड़ी है !” (मत्ती 25:41) . “मिनख मातर सांरू अेकर मरणौ तै है, नै पाछै परमेसर रौ न्याव भी तैसुदा है” (इब्रा० 9:27) .

नमौ चितराम

औ चितराम अेक अेडै भगत अर विमवासी कै मसीही नें देखावै जकौ परमेसर रौ विसवास करियौ, केई लोभ लालच नै करड़ा इम्तिहाना सूं जीत परौ नै आयौ . उणरै चारूमेर भांत भांत रा लोभ - लालच है पण वो वांसू बिना डिगियां, छेड़ौ पकड़चां मजबूती सूं थिर ऊभां है नै जाणै ‘क प्रभु ईसू मसीह रै जरिये म्हारी जीत पक्की है . वो सांची मसीही दौड़ में खाली बड़ियौ कोनी,

लगोलग जोस में भाग रहचौ है . “उणरी निजर प्रभु ईसू माथै लागी थकी है जिण माथै आदि सून अन्त ताई आपाणौ विसवास टिक्योड़ौ है” (इब्रा० 12:1,2).

विसवास वाळै हियै नें सैतान अर उणरी काळी फौज घेरनै नाकाम कोसीस करै 'क परमेसर रौ टाबर खौटौ गैलो पकड़लै . अठै चितराम में घमंड, धन रौ



नमौ चितराम : जय पायोड़ौ हियौ

मोह नै लम्पटपणौ तकात देखाया है . चीतै री जागा अठै गधेड़ौ है क्यूं कै पाप केई दाण दूजा रस्तां सूं आवै नै खुदनै अलग भांत कै नांव सूं लुकायलै . पण सावचेत भगत 'क मसीही पैचाण लेवै 'क औ पाप है; भलैई वो धरम रै भेख में व्है या चानणै रै सरगदूत रै भेख में क्यूं कै परमेसर रौ वचन अर पवीत आतमा उणनै सांच कानी ले जावै . ओक जणौ हाथ में दारू री गिलास लीयां मसीही रै ओळौ-दोळौ नाचै अर उणनै दुनियांदारी कानी लुळावण री चेस्टा करै . पण परमेसर नै अरपित सांचा भगत विसवासी माथै उणरौ की असर नीं व्है क्यूं कै वो खुदोखुद नें ईसू प्रभु सागै पाप अर दुनियांदारी सांरू सूळी चढ़ाय दीयो . चितराम में दूजौ मिनख मसीही नें छुरी घौपै . सांचै मसीही ने पापी अर देखावटी मसीही रा अनादर, गप्पा, खिखरां नै तड़ी री छुरी लगोलग घोपती रेवै . वो लोगारै केयै ध्यान नीं देवै, परमेसर नें ध्यावै . वो प्रभु ईसू रा वचन याद राखै. "धत्र हौ थे जे मिनख म्हारै कारणे थारो बुरायां करै, दुख देवै नै कूड़ बोल थारै खिलाफत री वातां करै . थानै हरख मनाणौ चईजै 'क थां सांरू सरग में वड़डौ फळ है'" (मत्ती 5:11,12) .

आपाणी पाप री आदतां नै सैतान इण वात में लाग्योड़ा रेवै कै कियां भी सांचो भगत अर मसीही परमेसर रो हेत बिसार दै . पण वो घणै मोद अर भरोसै सूं छाती ठोक कैय सकै - "म्हाने मसीह रा प्रेम सूं कुण छेटी कर सकै ? कांई मुसीबत, अबखाई, तरवार, भूख, गरीबी, खतरा 'क मिरतु ?'" (रोमि 8:35) . "कत्तई नीं, यां सगळी वातां माथै म्है उणरी मया सूं जकौ म्हानै प्यार करै, जीत पायली !" (रोमि 8:37) . परमेसर रा सगळा हथियार धारियां पाछै उणमें सैतान रै हमलै रौ मुकाबलौ करण री सगती है वो प्रभु ईसू रै जरियै सगळा इम्तिहानां में फते पावै क्यूं कै सगळा इम्तिहानां में प्रभु ईसू री भी फते हुई . उणरी सगती री सामरथ में आपां जका उणमें विसवास करां फते व्हे सकां नै महिमा रौ मुगट पाय सकां (इफि 6:10-18; 1 पतरस 5:4) .

तारो : भगत मिनख रौ विवेक बतावै जकौ साफ चमकै . उणरौ हियौ विसवास

नै पवीतआतमा सूं भरचो थकौ है . सरगदूत जकौ परमेसर रौ वचन है वानै याद करावै 'क जका जै व्है अर आखर ताई धीजौ राखै वाने घणमूंगा आसीसा बगसीजै . "जका जीतैला, म्है वानै उण जीवण रै रूख सूं, जकौ परमेसर रै सरग बाग में है, फळ खावण नें दूला". "जका फते व्हैला वानै दूजी मिरतु सूं पीड़ नी व्हैला". "जका फते व्हैला वानै थोड़ौ छिपायोड़ौ दिव्य अन्न दूला". "वां मांसू हरेक नें अेक धौळौ भाटौ दूलां जिणमाथै अेक नुवौ नांव मंडियौ थकौ व्हैला". "फते व्हेण वाळां री सदा फते व्हैला-अन्त ताई जकौ म्है चावूं, म्है वानै वे ही हक दूला जका म्हारा पिता म्हनै बगसिया". "जका जीतैला वानै अैड़ाहीज धौळा गाभा पैराऊंला अर वारा नांव जीवतां री पौथी सूं नीं मिटैला. म्हारा पिता अर वारा सरगदूतां री साख में, म्है खुल्लौ अेलान करूला 'क अै म्हारा मिनख है". "जकौ जीतैला उणनै म्हारै परमेसर रा मिन्दर रा थांबा बणाय दूला ताकि वे उठै सदीव रैय सकै". "जीतण्या नै म्हारै पाखती सिंघासण माथै उणी तरा बैठाऊंला ज्यूं जीत रै केड़ै म्है म्हारा पिता सागै वारै सिंघासण बैठौ हूं" (प्रका०वा० 2:11,17,26; 3:5,12,21).

रकम री खुली कोथळी : आ बतावै कै वो आपरा हिया सागै सागै आपरो धन भी परमेसर रै अरपण कर दीयौ . आपरी रकम नें खुदरै सवारथ सांरू खरचण री बजाय वो गरीबां री मदद करै . आमदनी रौ दसवों भाग- अठैताई 'क खुदरौ आखौ धन परमेसर नै अरपण कर दै, उणरी महिमा सांरू हरैक चीज खरच दै.

रोटी नै मछली : आ बतावै कै वो खरौ, पवीत नै सधियोड़ौ जीवण बितावै. वो जीवण नें तेज दारू रा नसा या सूगला भोजन सूं नीं विगाडै (प्रेरितो० 15:20) . वो धन-सम्पत नै बरबाद कोनी करै न आपरा सरीर नें - जकौ परमेसर रौ मिन्दर है . वो जरदा-तमाखू खावै, पीवै या सूंघै कोनी, न वो नसै री कै नुकसाण करणवाळी दवायां लेवै पण वो सादो सुध्ध नै ताकतवाळौ भोजन करै . उणरौ खुदरौ हियौ प्राथनाघर बणग्यौ है . वो बिरोबर मिन्दर गिरजै जावै चाहे मेह-छांट व्हौ 'क दूजी अबखाई . प्राथना उणनै आछी लागै भलैई वा मिन्दर नै गिरजै में व्हौ या खुदरै घर - कमरै में . वो जाणै कै सांजौ मसीही परमातमा सूं सम्परक

बगैर आगै नी वध सकै .

खुली पौथी : औ जणावै 'क बाइबल जकौ परमेसर रौ वचन है; उण सांरू सदीव खुली है . वो रोज इणनै बांचै अर समझै . इणसूं वो सुबुध, सगती, जीवण, चानणौ अर अलेखूं धन पावै . उणनै गैलो वतावण सांरू जोत अर सैतान नै हरावण सांरू तरवार रौ काम साजै . बाइबल उण री आत्मा रौ भोजन, तिरस मेटणवाळौ पांणी, जीव सुध्धी सारू सिनान-सपाड़ा रौ साधन अर खुदने निरखण री आरसी है .

खुदरी सूळी तोकण में उणनै आनन्द आवै, वो जाणै 'क सूळी री पीड़ बिना इनाम नीं मिळै . वो जाणै 'क प्रभु ईसू सागै वो पाछौ ऊभौ व्हेयौ है ताकि वो नुवी जूण जीवै, धरती री चीज वस्त री बजाय वो सरग री चीजां माथै ध्यान धरै (कुलु 3:1-2) . वो परमेसर सूं मिळण सांरू त्यार है . वो ऊण रूख दांड है जिणनै पाणी रै नजीक रोप्यौ व्हे नै जकौ रूत आयां फळ देवै . उणनै मिरतु रौ कत्तई भौ नी व्हे क्यूं कै पवीत आतमा सूं मिल्यौ थकौ परमेसर रौ हेत उणरै हियै में भरचौ थकौ है .

दसमौ चितराम

प्रभु ईसू कैयौ "मिरतु ने जीत पाछौ ऊठणौ अर अमरत जीवण म्है हूं . जकौ म्हारौ बिसवास करै वो मरियां केडै भी जीवतौ रैसी, जकौ जीवै अर बिसवास करै वो कदैई नीं मरसी" (यूहन्ना 11:25,26) . "जकौ म्हारा वचन सांभळै नै उण परमेसर में आस्था राखै जकौ म्हनै देवरूप दीयौ है, उणरौ इम्तिहान न्याव रै बगत नीं व्हेला . बलकी वो मिरतु सूं निकल जीवण पाय लीनौ है" (यूहन्ना 5:24) . मसीही नै मिरतु न भौ कै इंडु लखावै . "मिरतु मिटगी, फते पूरण है ! मिरतु थारी जीत कठै ? मिरतु थारौ डंक कठै ? परमेसर रौ साधुवाद जको आंपानै प्रभु ईसू रै जरियै फते करै !" (1 कुरिं 15:54-57) .

मिनख जकौ परमेसर सागै जीवै अर हालै उणनै मिरतु रौ भौ नीं रेवै . अन्त समै आयां वो राजीखुसी जावै जियां सन्त पौलुस केवै "मन घणौ चावै कै औ जीवण छोड़ प्रभु ईसू कत्रै जाऊं जकी घणकरी आछी वात है" (फिलिं 1:23) .

अेक मसीही आपरा प्रभु ईसू रा दरसण रौ कोड़ राखै जकौ उण सांरू प्राण दीया, उणरा पाप सांरू सूळी चढियौ . पवीत आतमा उणनै प्रभु ईसू रा वचन याद करावै, "मन में चिन्ता 'क खेद मत पाळौ . थे परमेसर पर विसवास राख्यौ, म्हारौ भी विसवास राखौ . म्हारा पिता रा घर में घणकरा कमरा है ... म्है पाछौ आयां



दसमौ चितराम : महिमा साथै सरग धाम यात्रा

खुद थानै ले जासूं ताकि थे उठै रेवौ जठै म्है रैवूं” (यूहन्ना 14:1-4) . अक अजोगती वात व्है सकै जकी कदैई देखी या सुणी कोयनी जकी परमेसर वां सांरू कीवी जका परमेसर सूं हेत राखै (1 कुरि० 2:9) . दुनियां में वा भासा नीं है जकी उण गजब सैहर रौ बयान कर सकै जकौ वां सांरू त्यार है जका इण धरती माथै प्रभु ईसू रै लारै पांवड़ा भरै .

आखरी चितराम में हाड़कां रै पींजर (मिरतु) री ठौड़ सरगदूत या परमेसर रौ सनेसो लावणियौ दूत दीसै . वो सुध आतमा नै परमेसर कन्नै लेजावण नें त्यार है . जीव नै आतमा नासवान सरीर रूपी भाखसी सूं बारै आयग्या है, अबै ऊपर सरग रा खुल्ला दरूजां मांय बड़ै जठै प्रभु ईसू है जकौ उण खातर सूळी चढ़ग्यौ . उणरै जोरदार अगवाणी त्यार है जठै परमेसर सांमी उणरा मालक प्रभु ईसू यां सबदा में बिड़दावैला “धन्न है थूं हे भला नै विसवास वाळा दास ! आगै वद अर म्हारै हरख में सरीक हू” (मत्ती 25:21) . उण माथै सैतान रौ की जोर नीं चालै क्यूं कै जकौ गरीब मरियौ उणनै सरगदूत सरग री दावत में इब्राहिम कनै बैठाणियौ (लूका 16:22) . पछै म्है सरग सूं वाणी सुणी “औ मांड दै! धन्न है वे जका अबै परमेसर री चाकरी करतां मरैला” . “हां ठीक है”, आतमा पड़ूतर दीयौ- “वानै अबै करड़ी मेहनत सूं आराम मिळैला क्यूं कै कीयोड़ी सेवा वारै सागै चालै” (प्रका० वा० 14:13) .

आखरी चेतावणी

पोथी बाचण्यां ! परमेसर थारी सहाय करै ताकि थें थारौ हियौ उणनै सूप सकौ जिणनें थे वाल्हा लागौ . वो थानै वतळावै “थारै हियै सूं म्हारै कानी पाछा मुड़ौ” (दानि० 30:2) . प्रभु ईसू नें थारौ थाकोड़ौ, निरास नै पीड़ वाळौ हियौ सूप दौ, वो थानै नुवो हियौ अर नुवौ मगज बगसैला . थारै धोखेबाज हियै सूं धोखौ तम खाज्यो या उणरी मंसावा मत मानजो क्यूं कै “मिनख रै हियै सूं खोटा विचार ऊपजै जका उणसूं कुकरम करावै” (मरकुस 7:21) . पापां नै तजौ अर सांच नै झेलौ क्यूं कै “पाप रै डंड री मजूरी मौत सूं भुगतावणी पड़ै, पण

परमेसर रो दान है अणत जीवण जकौ आपणा मालक प्रभु ईसू सागै बन्ध्याँ रेवै” (रोमि० 6:23) . आप जका जीवण परमेसर नै सूप दीयाँ वानै उणरौ हैलौ है- “अबै म्हारा सिखायोड़ा सांचा वचनां में पाका रैवो, जकौ थारे वास्ते आगे वढ़णे रो नमूनो है ताकि थै प्रभु ईसू मसीह री संगति, विसवास अर प्रेम में वण्या रौ” (2 तिमु० 1:13) . इणी कारणै सन्त पौलुस 2 तिमु० 1:12 में लिख्यौ “म्है उणनें जाणू जिणरौ म्हनै भरोसौ है, म्हनै पक्कौ भरोसौ है ‘क वो म्हनें उण दिन तांई सावळ राखण जोगौ है जकौ वो म्हारै सांरू तै राख्यौ है’” . परमेसर रा बिसवास में खुदने ऊँचौ ढाळ्यौ, पवीत आतमा सूं प्राथना करौ, परमेसर सूं हेत पाळ्यौ अर थारी निजरा प्रभु ईसू माथै राखौ . जको खुद ही मारग, सांच और जीवण है . आपणौ मालक बैगो पाछौ आवेला नै आपरा टाचरां नै ले जावैला- “राजावां रौ राजा अर मालकां रौ मालक” (1 तिमु० 6:15) .

“अबै जकौ थाने ठोकर सूं बचाय सकै, खुदरै महिमा सांमी थारै निरदोस खुस जीवण नें आपाणां स्वामी प्रभु ईसू मसीह जरिये लाय सकै, उण अेकलै परमेसर अर आपणै तारणहार री मैहमा, गौरव, सगती, जकी जुगां सूं है; अर आगै भी सदावंत होती रैवै ! आमीन” (यहूदा 24,25) .



परमेसर रा सांचा वचन

“जकौ मिनख पाप करै है, वो परमेसर री व्यवस्था सूं सामौ राखै अर पाप व्यवस्था रौ बैरी है” .

“थै जाणो ‘क वो इण जोग परगटचो ताकि पाप हरनै ले जावै, क्युं के वारा सुभाव में पाप नीं है” .

“उण मांय जकौ बण्यो रै, वौ पाप नीं करै . पण जकौ पाप करै वो उण ने देख्यो ‘क जाणै नीं” .

“टाबरां ! भरमाण मांय मत रैवो . उण रा सा करम करचा ही कोई मिनख वारै समान धरमी व्हेलो” .

“वो सैतान रो दूत है जकौ पाप करै है, क्युंक सैतान हमेस सूं पाप ही करतो रचो है . परमेसर रो सपूत इण कारण परगटचो ‘क सैतान रा करमा नै नास करै” .

“पाप वारै सूं नी हो सकै जकौ परमेसर सूं जिनम पाव्या, कारण ‘क वारौ बीज उण मांये कायम रै अर कदई ‘क पाप करै कोनी क्युंक वो मिनख परमेसर सेती जिनम्यौ है” .

“जकौ कोई नीं तो धरम रा काम करै अर नीं आपरा भाईयां सूं परेम, वो मिनख परमेसर रौ कौनी . इण सूं ही पिछाणीजै ‘क वो परमेसर रौ टाबर है ‘क सैतान री औलाद” .

(1 यूहन्ना 3:4-10)

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de www.angp-hb.co.za ou comme une Application "Heart of Man" sur téléphones Android.

Este livro "O Coracao do Homem" é obtido em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratuftamente a literatura evangelica, livros e folhetos em mais de 538 lnguas diferentes escreva para:

E-MAIL: info@angp-hb.co.za
info@angp.co.za

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations
Une Mission de litterature evangelique financee de dons
Missao de literatura Evangelica financiada por donativos

(Reg. No. 1961/001798/08)